


Gradonačelnik i predsjednik Skupštine grada na onlajn dodjeli zahvalnica i plaketa izvrsnosti Projekta MEG

09.02.2021 - 15:00

Gradonačelnik Prijedora Dalibor Pavlović i predsjednik Skupštine Grada Mirsad Duratović učestvovali su danas na dodjeli onlajn zahvalnica i plaketa izvrsnosti prvoplasiranim partnerskim jedinicama lokalne samouprave u sklopu MEG projekta, među kojima je i grad Prijedor.



Projekat MEG je projekat opštinskog i ekonomskog upravljanja, koga finansira Vlada Švajcarske, a implementira Razvojni program Ujedinjenih Nacija -UNDP BiH.

Iz UNDP-vog tima MEG projekta je, u pozivu za ovu video konferenciju, saopšteno da se u protekle četiri godine kroz ovaj projekat intenzivno radilo na poboljšanju rada javne uprave kroz niz aktivnosti. Krajem prošle godine završen je finalni proces nezavisne evaluacije i procjene učinka na polju dobre uprave, na isti način koji je primjenjen u inicijalnoj evaluaciji rađenoj krajem 2016.god. tj. na samom početku prve faze MEG projekta.

Na ovoj onlajn konferenciji organizovana je virtuelna dodjela plaketa izvrsnosti MEG projekta, jedinicama lokalne samouprave koje su svojim radom i zalaganjem u protekle četiri godine projekta, uspjele ostvariti najbolji plasman po pojedinačnim kategorijama sistema upravljanja učinkom. Dodjela je organizovana na osnovu rezultata nezavisne evaluacije tima konsultanata koji su kao osnovu koristili 21 indikator i 104 podindikatora, unutar četiri ključne oblasti koje čine sistem upravljanja učinkom na lokalnom nivou, i to: Liderstvo, predstavnička uloga, odlučivanje i nadzorna uloga OV/SO, Transparentnost i odgovornost lokalnih vlasti, Učešće javnosti u procesu donošenja odluka i Efikasnost i efektivnost JLS.

Gradonačelnik je u svom obraćanju na ovoj video konferenciji istakao značaj projekata koje su tokom četiri godine u više ciklusa realizovani na području grada Prijedora.

" Sve realizovane aktivnosti u oblasti infrastrukture i podsticaja zapošljavanju novih radnika, kroz povećanje konkurentnosti malih i srednjih preduzeća, doprinijelo je poboljšanju kvaliteta života, ali i transparentnosti i otvorenosti prema građanima", istakao je Pavlović.

Učešće u ovoj video konferenciji imao je i predsjednik Skupštine grada Mirsad Duratović, koji je govoreći o značaju projekta MEG, istakao da je Grad Prijedor kroz MEG projekat dobio pomoć za realizaciju aktivnosti na jačanju lokalne samouprave i pružanje javnih usluga. "Aktivno se krenulo u poboljšanje pružanja administrativnih usluga, povećanje transparentnosti rada Skupštine Grada i uključivanje građana u procese donošenja odluka", istakao je Duratović.

Prva faza Projekta MEG trajala je u periodu 2017-2020. godina i u dva ciklusa su dobijeni grantovi za implementaciju dva infrastrukturna projekta i to:

- Izgradnja primarnog kanalizacionog sistema u naseljima Orlovača, Čirkin polje i dijelu Industrijske zone "Svale", ukupne vrijednosti 532.596,61 KM (265.488,15 KM - donator i 267.108,46 KM - Grad Prijedor) i projekat

- "Unapređenje vodovodne infrastrukture na području Grada Prijedor" (izgradnja sekundarne vodovodne mreže sa kućnim priključcima u ulicama Ive Andrića i VI Krajiške brigade i dijelu naselja Čirkin polje), ukupne vrijednosti 937.386,52 KM (428.822,00 - donator i 508.564,52 KM - Grad Prijedor).

Pored toga, Projekat MEG je dodijelio grant sredstva, takođe u dva ciklusa, za podsticaje za zapošljavanje novih radnika kroz poboljšanje konkurentnosti MSP i to :

- 2018-2019. godina- donator 40.016,00 KM i 60.838,00 KM-Grad Prijedor=100.854,00 KM i - 2019-2020. godina- 173.700,00 KM-donator i 121.554,00 KM Grad Prijedor.

Grad Prijedor je, kao nagradu za plasman među top tri jedinice lokalne samouprave u Projektu MEG, dobio donaciju informatičke i druge opreme (deskopt računari, laptopi, dron, multifunkcionalni printeri, projektor sa platnom, laserski daljinomjeri...) u vrijednosti oko 51.000,00 KM, koja je poboljšala tehničku opremljenost zaposlenih u Gradskoj upravi.